

# Jut Kumwimp Pas

Mekia Akwapnámp Kar

Jut te Jisasomp nánae ankwap. Jisas pok tenánko, 40 a, 50 yopwar niamp arake fek mao máma pas má kumwimp te kápae kare sios mekamp koumteouráp arop fárákapao fwapia kárakáre fek yakáprá am Kwarén mér nap fwapia taokeyakáp mwanapria nimpon. Aeria mao ‘Yumo kwekár kar sérarnap arop fárákapamp kar wawi kwapono’rá sénámpon.

---

<sup>1</sup> Kwaro wumwirinámp arop fárákap e! Ono Jut, Jisas Kraisomp tére konamp arop, Jemsomp nánaerao, yiráp por má pas kumwi nampon. Naropwar Kwaro yumwan nouroup kare nánko, Jisas Kraís námoku yumwan taokeyak konámpon. <sup>2</sup> Onomp ninik te, Kwaro yumwan yaewour nánko, maomp aropomp ninik ntia yonkwae porokwe ninik, tá ankwapyaenápént nonopok nounouroup i konap ninik, yiráp ninik mek top-pwarámpá yakanoria nampon.

## Kwekár tisa

<sup>3</sup> Ononamp fárákap, ono manénkir Kwaro nomwan ponankor warko éréképnámp karan kumwi nae nampao, pwarará ono ankár ankwap kumwi namp máte aránon: Yumwan arop ankwapao youwén táman, Kwarén mérnáp pwarenkria wouroumpnap kar te yumo ankár am kar far-pwar kipo. Kwaro náráp firáp arop nomwan mérenkria ankárank por sáp námp wae támao ara, yumo fwapia am mér taokeyakáp kipo. <sup>4</sup> Am te arakono: Kwaro ninik námpaok monap arop ankwap fárákap kánánkámp sios mek korop naponno. Am fárákapao kokopor ninikaok paokopria arakrá kwekárará sér, “Nomo te Kristen ara, fwap námokunámp ninikaok paokop nánko, Kwar te aropomp tokwae námpara, nomwan kot mono.” Takrá sénap arop nomwan taokeyak konámp Jisas Kraís Tokwae Karan younkwe mwaek sítea paokop naponno. Kwaromp Buk fekamp karao manénkir séri námp te, ‘Kwaro kotianánko, touwe tokwae sámp mwanap’ ri námpon.<sup>a</sup>

<sup>5</sup> Kwar Tokwaerao Israel firan apár Isip mekamp éréképea ankwap mek akwapámpan maok, am mekamp arop ankwap fákáre man mér mo

---

<sup>a</sup> 1:4 Ro 6:15; 2 Jo 9-10

napo, nkwakwe make touwe nénkánko, am fek faokarapon. Yumo amimp kar wae mér napan maok, yumwan ‘Warko ninik kip’rá sénampono.<sup>b</sup> <sup>6</sup>Wokwaek kar te ensel ankwap fákáreao kor námokuráp tére mwanap furu mek yakáp moria, Kwaro sánknámp némp kwapwe pwararapon. Aeapantá maok, Kwaro am fárákapan sen fek fápákampia kák tenánko, kirikip támáre mek yakápria Kwaro kot naenámp yae tokwae táman yépékrá yakáp napon. Aenapan onomp ninik te, yumo am táman ninikenkria nampono.<sup>c</sup> <sup>7</sup>Tá Sodom ntia Gomora mek taun wonae fik am fekmwaek yakápap aropao kor am ensel fákáreaoiapnámp taknámp kokoporrá paokopria maok, nkwakwe make sokororá kokopor mént takrá paokopapantá maok, Kwaro am fek táman yaomwi ankár yurunki yaknámp mek fápákamánkia épér i tenámpon. Am takimp kar nomwan érik sénámp te nomwan kor ‘Am takiap ninikaok paokopi kwapon’ ria sénámpon.

<sup>8</sup>Aeno oukoumwan yumo ou mek yakápnap aropao kor nkwakwe make ankank yémén nke ko pwarará, am támao ninik nénk nánko, námokuráp pourouan kwatae papria maok, nomp Kwar Tokwaeramp kar ták-sirirá paokoprá, yámar mek yakápnap enselén kor wouroump napon. <sup>9</sup>Manénkir ensel tokwae Maikelo kor, Mosesomp yákáre te wa sámp kunoria Satanént nonopok kar yorowaria maok, Maikel te Satanén nopok wouroump-sér mono. Mao sérrá, ‘Nánkár Kwar Tokwae námoku amwan touwe sánk naenámpon.’<sup>d</sup> <sup>10</sup>Aeno am yumont yakápnap tisa kwatae te mao fi kor mér monap ponankor ankankan wouroump kar sérar napon. Am fárákap te yao pwae mekamp firao ninik kour sámp moitea, námokuráp ninik fek paokop nap niamp napara, am taknap ninik támao am fárákapan kwatae pap námpon. Am fárákap te koupoutáráp nape! <sup>11</sup>Am fárákap te Kenomp ninik fek paokop napon. Ankwap te Balamoi námpnámp taknámp, mani sámp mwanap mwae kupan saráp ninikrá paokopria, Kora Kwaromp kar ták-sirirá yárákimpnámp taknámpria am fek sumpwi mwarea napono.<sup>e</sup>

<sup>12</sup>Yumo nounourou i konap fir kékérourá fánap ke fek, am kwekár tisa fárákap te am fek koropriaka am fi ninik moria námoku saráp ninikria am fir mwar fára waeria maok, pwarápa mo i konapon. Am taknap fárákap te yiráp koupoukournap ninikan oumi pap napon. Am fárákap te warákam korop naeria támáre námpan ouwi koropria mankár-sakwap konámp niamp taknámpi yakáp napon. Tá ankwap te, ankankoroao tanknámp ke fek tank mo námp niamp. Tá ankwap te, am aopwe koran ouwirao tuk-sinánko, fi mokor-tankria yonkwae konámp

<sup>b</sup> 1:5 Nam 14:32-35; 1 Ko 10:5-10    <sup>c</sup> 1:6 Stt 19:1-10,15-16,24-25; 2 Pi 2:6-9    <sup>d</sup> 1:9 Lo 34:6; Dan 10:13; Yé 12:7-8    <sup>e</sup> 1:11 Stt 4:8; Nam 16:1-3,16,19-21,25-33; 31:15-16; 2 Pi 2:15-16; 1 Jo 3:12; Yé 2:14

niamp napono.<sup>f</sup> <sup>13</sup> Am fárakapamp ninik te éntenk tokwae ékria kápae kare yao tiri ént you woupwi mek tirá fémpér nánko, am yao tiri ntiaka aroponk fokopa wae konámp niamp napon. Tá ankwap te térme ankwap Kwaro pátenámp mwae kup yak nánko, námokuráp ninik fek paokop nap niamp napara, Kwaro am fárakapao nopok touwe kwatae sámpá yakápi-yakáp mwanap kirikip tokwae nánapi pwate námpon.

#### **Am arop fárakap touwe sámp mwanap kar**

<sup>14</sup> Adam feknámpia tokwampok kear akwapeanángo, fákánerao Inok profet téreria am fárakapamp ninikan farákáprá arakrá sér: “Yumo nkenke! Kwar Tokwae náráp kápae kare fopwakwap ensel fákárerént ék námpon. <sup>15</sup> Kwar Tokwae te apárokamp arop fárakapan kotriaka, náráp ninikaok paokop mo, kwatae ninik fek saráp yakria, man nkwakwe make kwatae kar sérarrá paokopria, man younkwe sitea paokop i konap arop fákáreran ponankor kotia touwe tokwae nénk naenámpmon. Aenángo maok, námoku am takrá paokopi nap fekamp touwe tokwae sámp nap ninik mwanapono.” <sup>16</sup> Am arop fárakapao apae-apae tére nap te, kwatae yak námpan énounkouprá ‘Kwatae nap’rá sérarria, ankwap ankankan warákár mo i konapon. Aeria námokunap ninikan saráp kikiank napon. Am fárakap te námokuráp eran sakaprá warákár-sér i konapon. Tá arop ankwap fárakapamp ankankan ti mwar ritea kar porokwerá kákámánkar i konapon.

#### **‘Yumo mér kárakáre fek yakáp kip’rá sénámp kar**

<sup>17</sup> Ononamp fárakap, yumo te nomp Jisas Kraís Tokwae Karamp aposel fákárerao farákápap kar táman warko ninik kip. <sup>18</sup> Am fárakap te yumwan arakrá sériapon, “Nánkár yae pwarnámp ke korop námpek arop ankwap fárakap Kwaro i konámp ninikan wouroumprá, man younkwe sirarrá námokuráp ninik kwatae fek kikiankrá paokop mwanape.”<sup>g</sup> <sup>19</sup> Am taknap arop fárakap sios fákáreamp ninik sámpá yampourou napo, ankárankamp pourouráp ninik fek yakáp mo i konapon. Apárokamp aropamp ninikaok saráp paokop napara, am fárakap te Yiki Kor Spirit morápono.

<sup>20</sup> Aeno ononamp fákáre, yumo ankár kápae kare por yumokuráp ninik kárakáre fek yakápria, yiráp Jisasén mér nap am te yiki kare ara, fwapia sámp-fákeyakápria maok, Yiki Kor Spiritamp kárakáre fek Kwarén kar toropwap kip. <sup>21</sup> Kwaro yumwan warákár kare námpara, yumo ankár maomp wonae fik kar yakápria, maomp warákárnámp ninik numwar yumwan oupouroupea yaká yakanoria yénképá yakáp

<sup>f</sup> 1:12 1 Ko 11:20-22; 2 Pi 2:13    <sup>g</sup> 1:17-18 1 Ti 4:1; 2 Ti 3:1-2

kip. Aeria maok, nomp Jisas Krai Tokwae Karao yumwan aropompria yiki yaká yakáp mwanámp ti-sáp naenámpan yépekrá yakáp kipo.<sup>h</sup>

<sup>22</sup> Yumo te arop ankwap fárakapan Kwarén mér nap fwapi kárakáre mo napan yonkwae touwe kip. <sup>23</sup> Arop ankwap fárakap te wae yaomwi mek piká yakáp nap niampnámp, koupour kar yae topwe fek éréprá kák kipo. Arop ankwap fárakapao ankár kwatae kare ninikaok saráp tukupnap aropan aropomp kipo. Aeno am fárakapan yaewour mwaria nap kwamp te, maonap kwatae ankank yumwan korokwapantáno, mér fek kipo.<sup>i</sup>

#### Kwarén 'Aesio'rá sér mwanap kar

<sup>24</sup> Kwar te yumwan fwap taokeyak námpara, yumo te sikirip mono. Mao te wae yumwan yiki kukarrá kák námpara, mao námokuráp wae kwapwe yaknámp némpouk éréképá pokeanáko, yumo kwatae niniki nap yak mono. Yumo ankár warákár tokwae kwapwe mwanapon. <sup>25</sup> Am Kwar ankárank támao nomp Jisas Krai Tokwae Karao tére námp fek, nomwan warko érékép námpara, nomo ankár maomp e ankárankan saráp sakap mwaro. Mao támao kárakáreráp wae tokwae fek yakria, nomp King Tokwae yakrá, kápae kare ankank te mao ponankor taokeyak námpon. Kwaromp am ankank te wokwaek kar ankank yoro mo fek kor taki yak, tá oukoumwan kor taki yak, tá nánkár wakmwaek kor taki yaká yak naenámp. Am te kare tak námpono.<sup>j</sup>

---

<sup>h</sup> 1:20-21 1 Ko 3:9-11; Kl 2:6-7    <sup>i</sup> 1:22-23 Ro 15:1; 1 Ko 15:33    <sup>j</sup> 1:24-25 Hi 13:8; 1 Pi 1:5; 2 Pi 3:14